

**Taarsigassarsisitsisarfinnut aningaasalersuisarfinnullu aningaasaateqarnissamut
piumasaqaatit nakkutilliinermilu piumasaqaatit pillugit Kalaallit Nunaannut inatsisip
allanngortinneqarnissaa pillugu inatsisip akuerineqarnissaa pillugu Inatsisartunut
aalajangiiffigisassatut siunnersuut**

(Aningaasaqarnermut Akileraartarnermullu Naalakkersuisoq)

pillugu

Aningaasaqarnermut Akileraartarnermullu Ataatsimiititaliap

siunnersuutip aappassaaneerneqarneranut

ISUMALIUTISSIISUTAA

Aningaasaqarnermut Akileraartarnermullu Ataatsimiititaliap suliarinninnermini kingullermik
ilaasortarai:

Inatsisartunut ilaasortaq Erik Jensen, Siumut
Inatsisartunut ilaasortaq Pele Broberg, Naleraq, siulittaasup tullia
Inatsisartunut ilaasortaq Jørgen Rosbach, Demokraatit
Inatsisartunut ilaasortaq Margrethe Thårup Andersen, Demokraatit
Inatsisartunut ilaasortaq Mimi Karlsen, Inuit Ataqatigiit, sinniisoq

UKA 2025-mi ulloq 15. oktober siullermeerinninnerup kingorna ataatsimiititaliap siunnersuut
misissorpaa.

Siunnersuutip imarisaa siunertaalu

Kalaallit Nunaata EU-p peqqussutaanut CRR-III-mut, aningaaseriviit aningaasaataannut aar-
lerinaatinillu aqutsinermut piumasaqaatinik sukateriffiusumut ilanngunnissaa siunnersuuti-
gineqarpoq. Tamanna pivoq nunatsinni aningaaseriviit nangittumik Danmarkimi EU-milu
aningaaserivinnut naligiimmik atugassaqarlutik ingerlatsisinnaanerak qulakkeerniarlugu. Taa-
maammak inatsit nunatsinni aningaasaqarnermut aningaasalersuisarnermilu aalaakkaasu-
nermut pingaaruteqarpoq.

Taarsigassarsisitsisarfiit taarsigassarsisitsisarnermi il.il. annaasaqaataasinnaasunik aammalu
taarsigassarsiaritanut aningaasaateqarnissamik piumasaqaatinik naatsorsuineri namminneq
periutsinik atuisut qanoq aningaasaateqartiginissaannik (outputgulu) piumasaqaatinik atuutsi-
silernissaq allannguutit pingaarnersarigaat siunnersuuteqartup paasissutissiissutigaa. Output-
gulu (qanoq aningaasaateqartiginissamik piumasaqaatip) siunertaraa taarsigassarsisitsi-

sarfinni namminneq periutsinik atuisuni aningaasaateqarnermut piumasaqaatit taarsigassarsisitsisarfinnut periutsinik nalinginnaasunik atuisunut sanilliullugu appasippallaalinnginnissaasa qulakkeernissaat.

Taamatuttaaq ”illuutip nalinga”-nik oqariaatsimut nassuiaat atuutsinneqalerpoq. Illuummut pineqartumut imaluunniit illuummut assersuunneqarsinnaasumut, ukiuni kingullerni arfinilinni illuutitut najugarisanut imaluunniit ukiuni kingullerni arfineq pingasuni inuussutissarsiu-tigalugu illuutitut nalilerneqartunut agguaqatigiissillugu naliusoq illuutip nalingata ilaatigut qaangissanngilaa, tassa illuutip nalinganut malunnaatilimmik nalitunerulersitsisunik illuut allanngortinneqarsimanngippat.

Siunnersuutip Inatsisartunit siullermeerneqarnera

Siunnersuut sivikitsumik oqaluuserineqareerluni taama iluseqartoq partiinit amerlanerussu-teqartunit taparserneqartoq aammalu aappassaaneerneqarnissani sioqqullugu Aningaasaqar-nermut Akileraartarnermullu Ataatsimiititaliamut suliarineqartussanngorlugu innersuunne-qartoq ataatsimiititaliamit oqaatigineqassaaq. Allannguutissatut siunnersuummik saqqum-miussisoqanngilaq.

Kiisalu aalajangiiffigisassatut siunnersuutip kalaallisuanut ilanngussami nalinginnaasumik nassuiaatini immikkoortoq danskisuuani imaattoq amigaataasoq oqaatigineqartoq ataatsi-miititaliamit maluginiarneqarpoq:

”2.9.3. Erhvervsministeriets overvejelser og den foreslåede ordning.”

Erhvervsministeren finder det hensigtsmæssigt, at der i Grønland gælder regler svarende til reglerne i Danmark på det finansielle område. Det foreslås derfor at sætte reglerne i CRR III i kraft for Grønland.”

Tusarniaanermut akissutit

Taarsigassarsisitsisarfinnut aningaasalersuisarfinnullu aningaasaateqarnissamut piumasaqaatit nakkutilliinermilu piumasaqaatit pillugit Kalaallit Nunaannut inatsisissatut siunnersuut ullormit 18. december 2024-mit 10. januar 2025-p tungaanut tamanut tusarniaassutigineqartoq siunner-suuteqartup paasissutissiissutigaa. Tusarniaaffigisaq ataaseq tusarniaanermut akissuteqarpoq. Taamaalilluni Grønlandsbankenip inatsisip piaarnerpaamik atuutilersinneqarnissaa pingaar-tuusoq oqaatigaa.

Ataatsimiititaliap siunnersuummik suliarinninnera

Taarsigassarsisitsinermi annaasaqaataasinnaasut, taarsigassarsiat nalinginik aaqqiinermi an-naasaqaataasinnaasut, ingerlatsinermi annaasaqaataasinnaasut, niuerfinni annaasaqaataa-sinnaasut aammalu outputgulvi (CRR-III) pillugit piumasaqaatinut tunngatillugu peqqussutip (EU) nr. 575/2013-ip allanngortinneqarneranik Europa-Parlamentip Rådillu peqqussutaata 2024, 31. maj 2024-meersup Kalaallit Nunaannit atuutsinneqalerneratigut Kalaallit Nunaata ilanngunnissaa pissasoq ataatsimiititaliamit oqaatigineqassaaq.

CRR III tassaavoq CRR-ip allanngortinneqarneratigut peqqussut. CRR III-kut siunertaavoq taarsigassarsitisarfiit patajaannerulersinnissaat aammalu aningaasalersuisarnerup aalaakkaanerunissaa, tamatumalu peqatigisaanik taakku taarsigassarsisitsisarnermut, siuariartortitsinermut suliffissaqartitsinermullu tapersersuinissaat.

Kiisalu inatsisissatut siunnersuut inuussutissarsiornermut ministerip nalunaarusiorneratigut atuutilersinneqassasoq ataatsimiititaliamit maluginiarneqarpoq. Malittarisassat atuutilersinneqannginneranni Kalaallit Nunaanni pissutsinut naleqqussaaneq pillugu nalunaarummik suliaqartoqarsimanissaa inatsisip atuutsinneqalernissaanut kalaallit oqartussaasuinit piumasaqaataasinnaavoq.

Peqqussutip nassatarisaanik allannguutit misissorneqarnissaannut inatsisissatut siunnersuummut nalinginnaasumik nassuiaatini immikkoortoq 2 innersuussutigineqarpoq.

Siunnersuummik suliarinninnermini immikkoortoq amigaataasoq 2.9.3 siuliani taaneqartoq ataatsimiititaliap malitseqartippaa aammalu paasillugu siunnersuummut nalinginnaasumik nassuiaatini oqaatsitigut imminnut naapertuutinngitsunik allanik peqartoq.

Atortussani nassiuuneqartuni kukkuneq Aningaasaqarnermut Akileraartarnermullu Naalakkersuisup allakkatigut 15. oktoberimeersutigut ataatsimiititaliamut ajuusaarutigaa. Tamatuma peqatigisaanik immikkoortumut matumunnga allannguutissatut siunnersuut pisariaqartoq saqqummiunneqassasoq Naalakkersuisup ataatsimiititaliamut ilisimatitsissutigaa. Kiisalu kukkunerit siunnersuutip danskisuaanut taamaallaat tunngasut Naalakkersuisut paasissutissiissutigaat.

Siunnersuummik suliarinninnermini Naalakkersuisut allannguutissatut siunnersuutissaat ataatsimiititaliap utaqqisariaqarsimavaa, tassami ataatsimiititaliap siunnersuummut isumaliutissiissutaanut inassuteqaataanullu ilanngussat oqaatsitigut assigiit kisimik aallaavigineqarsinnaammata.

Naalakkersuisut allannguutissatut siunnersuut imaattoq ulloq 17. oktober saqqummiuppaat:

”Namminersorlutik Oqartussat Taarsigassarsisitsisarfinnut aningaasalersuisarfinnullu aningaasaateqarnissamut piumasaqaatit nakkutilliinermilu piumasaqaatit pillugit allannguummik Kalaallit Nunaannut inatsisissamik siunnersuummut ilanngunneqartumut ilanngunnissaat pillugu Inatsisartut aalajangiiffigisassaattut siunnersuut.”

Naalakkersuisut allannguutissatut siunnersuut ilaatigut ima tunngavilersorpaat:

”Allannguutissatut siunnersuummi siunertaq pingaarnersaq tassaavoq, qallunaatut allatap kalaallisut allatamut assingulernissaa. Taamaasilluni inatsisissattut missingiutip qallunaatuuani kisingajammi aaqqiisoqarpoq. Kalaallisuuani 2.1.2-mi aamma 2.5.2-mi annikitsunik marlunnik aaqqiisoqarpoq. Allannguutit aaqqissuinnermut kisimik tunngassuteqarput, siunnersuutillu imarisaanik allannguinaatik.”

Immikkoortoq siunnersuummik siullermeerinninnermi ujaartorneqartoq sooq kalaallisoortaani ilannginnersoq ataatsimiititaliap taamaalilluni paasivaa. Naalakkersuisut allannguutissatut siunnersuutaatigut ataatsimiititaliap paasivaa danskisuaa kukkuneqarsimasoq. Taamaalillutillu Naalakkersuisut allannguutissatut siunnersuuteqarnermikkut siunnersuummut matumunnga ilanngussap danskisuaa kalaallisuaanut naapertuuttunngortippaat.

Naalakkersuisulli allannguutissatut siunnersuutaanni taasissutissap danskisuuata kalaallisua-talu imminnut naapertuutinninnerat ataatsimiititaliamit ajoraluartumik maluginiarneqarpoq. Oqaatsit marluk atorneqartut imminnut naapertuulluinnarnissaat qulakkeerniarlugu Naalak-kersuisut allannguutissatut siunnersuutaannut allannguutissatut siunnersuut una Aningaasa-qarnermut Akileraartarnermullu Ataatsimiititaliamit matumuuna saqqummiunneqarpoq:

“Taarsigassarsisitsisarfinnut aningaasalersuisarfinnullu aningaasaateqarnissamut piumasaqaatit nakkutilliinermilu piumasaqaatit pillugit Kalaallit Nunaannut inatsisip allanngortinneqarnissaa pillugu inatsisissatut siunnersuutip ilanngussatut ilanngunneqartup Kalaallit Nunaanni Namminersorlutik Oqartussanit ilannguf-figineqarnissaa pillugu Inatsisartut aalajangiiffigisassaattut siunnersuut.”

Siunnersuutip aningaasaqarnikkut kingunerisassai

Taarsigassarsisitsisarfinnut aningaasalersuisarfinnullu aningaasaateqarnissamut piumasaqaatit nakkutilliinermilu piumasaqaatit pillugit Kalaallit Nunaannut inatsimmik atortussanngor-titsineq Namminersorlutik Oqartussanut aningaasaqarnikkut kinguneqassanngilaq.

Siunnersuutip inuussutissarsiortunut il.il. aningaasaqarnikkut allaffissornikkullu kingunerisassai

Aningaasalersuisarnernik ingerlatsivinnut il.il. nakkutilliineq Kalaallit Nunaata tigunguun-gilaa. Tamatuma kingunerisaanik Finanstilsyni Kalaallit Nunaanni aningaasalersuisarfinnik nakkutilliisuvoq. Inatsisissatut siunnersuut inuussutissarsiortunut il.il. aningaasaqarnikkut allaffissornikkullu kinguneqartussatut naatsorsuutigineqanngilaq.

Siunnersuutip innuttaasunut aningaasaqarnikkut allaffissornikkullu kingunerisassai

Soqanngilaq.

Ataatsimiititaliap inassuteqaatai

Naalakkersuisut allannguutissatut siunnersuutaannut ataatsimiititaliap allannguutissatut siunnersuutaa akuerineqassasoq ataatsimiititaliap **isumaqatigiittup** inassutigaa.

Tamatumunnga pissutaavoq oqaatsit atorneqartut imminnut naapertuulluinnarnissaat qulakkeerniarlugu Naalakkersuisut allannguutissatut siunnersuutaata kalaallisoortaani ataatsimiititaliap iluarsissuteqarmat.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.

Erik Jensen
Siulittaasoq

Pele Broberg
Siulittaasup tullia

Jørgen Rosbach

Margrethe Thårup Andersen

Mimi Karlsen
Sinniisoq